

IN THE MALEKULA ISLAND COURT
OF THE REPUBLIC OF VANUATU
(Other Jurisdiction)

CIVIL CASE 1849 OF 2020

BETWEEN: FAMILY TAMAT

Claimant

AND: KEMUEL HARRY

Defendants

Date of Hearing: 25 March 2021
Date of Judgment: 26 March 2021
Before Justices: Kalangis MELE (Chairperson), Alina MALAPA, Edwin EDWIN
Clerk: Collyne Tete Maki
In Attendance: Claimant - Present
Defendant – Present

JUDGMENT

Kot emi welkam ol parties mo ol famile memba we oli present blong listen long kes blong bladlaen blong man ia Tamat. Jeaman blong kes em i talem maot olgeta tri (3) jastis we oli sit daon long kes mo I no gat any objection we wan long tufala parties I mekem long olgeta. Kot em i letem ol parties oli save se evri jastis ia oli relate long tugeta saed parties and wanem we bae kot I mekem decision long em bae em i follem nomo ol toktok blong olgeta we bae I kam maot long kot.

Kes ia emi registered bifo long Malekula aelan kot follem *Island Courts ACT CAP 167 section 10. Application of customary law: Subject to the provisions of this Act an island*



court shall administer the customary law prevailing within the territorial jurisdiction of the court so far as the same is not in conflict with any written law and is not contrary to justice, morality and good order mo tu;

Guided by the Island Courts (Civil Procedure) No 28 of 2005 Rule 1 subsection 1 to 7 stated" Starting of a civil claim"

ISSUE BIFO LONG KOT:

1. *Whu long tufala parties ia kleimen or defendan nao em i stret bladlaen blong man ia TAMAT?*
2. *Hao nao kleimen mo defendan I relate long man ia TAMAT?*

BACKGROUND BLONG CASE

Mr Josiah Nato blong Tautu vilij emi filem wan kleim I kam long aelan kot long 26 blong manis May 2020 agensem Mr Harry Kemuel blong Tautu vilij mo kleim se Tamat em i blad laen blong em. Long risen why em i filem kes blong bladlaen from we decision blong lan kes emi declarem graon blong Tervaut em i ko long family Tamat be whu long tufala nao emi stret blad laen blong Tamat?

Defendan emi tekem Mr Dungen Harry blong emi spokesman on behaf blong em mo kleimen em i representem em wan mo ol family blong em. Defendan em i no bin agri wetem kleim blong kleimen mo kleim se Tamat emi bladlaen blong em mekem kot I askem nem blong ol witness blong tugeta parties mo sendem talem long olgeta blong ko aot long kot rum from we bae kes ia em i ko long trial.

KLEIM BLONG KLEIMEN

Kleimen emi filem wan applikesen mo wan sworn statmen blong sapotem applikesen blong em I kam long kot mo talem olsem se defendan Harry Kemuel emi no bladlaen blong Tamat. Kleimen em I statem mo refer I ko long lan kes Tervaut mo talem se ol family oli bin agri mo jusum defendan blong emi spokesman blong olgeta long lan kes blong Tervaut wan graon we I stap long Brenwei vilij long Northwest blong Malekula aelan. Em i statem tu se em i bin pat long kes ia olsem wan witness blong sapotem kleim blong graon we I pass long kot mo long taem ia kleim em i blong man ia Tamat we em from we em I kleim tru long bladlaen blong mama blong em Mathlen we emi only daughter mo laef blad blong Tamat.

Kleimen em i filem tu wan family tri blo Tamat we i gat generesen blong Timbrepe we emi Annexem "A". Long family tri ia emi putum 2 olfala we em i no putum mo no save nem blong tufala we tufala nao i bonem Jeala, Milen, Tamat, Leitasi mo Lemiten. Tamat emi maretem Kethy mo tufala I bonem Mathlen mo Daniel mo Daniel I ded. Mathlen emi maretem Nato blong Tautu vilij we I bonem Daniel, Masia, Josiah we emi filem kleim, Jenny, Nesan, Kerlen, Niku mo Rota. Daniel emi maretem Thomasing mo bonem Malison, Masia maretem Ellena mo bonem Solive, mo Josiah emi maretem Kathleen mo bonem Alroy.

Em i filem tu family tri blong defendan we emi Annexem "B" we I soem se Rambe em i maretem Tengre mo tufala i bonem tu boe we fes bon i no gat nem long family tri mo second bon emi Harry. Harry I maretem Emily we tufala I bonem Lui, Kipion, Kemuel, Tele mo Emol. Lui I maretem Nelly mo bonem Lami, Kipion emi maretem Haimak mo bonem Nitu.



Kemuel em i maretem Tolsie mo bonem Rambe, Tele em i maretem Adlyn mo bonem Ramsay.

Kleimen em i refere i ko long sam documentari documentu we em i bin filem i kam blong ol hae Kot olsem Magistrate kot long civil kes 18 blo 2015, Supreme kot Civil case 1790 blo 2017, mo Malekula aelan kot civil case 621 blo 2020.

TOKTOK BLONG KLEIMEN LONG KOT BLONG SAPOTEM KLEIM BLONG EM

Kleimen em i summarisem kleim blong em mo talem tu long kot se, em i kleim tru long pupu woman blong em Mathlen we em i only pikinnini gel blong Tamat from we brata blong Mathlen we emi Daniel emi ded and only surviving blad blong Tamat emi Mathlen we i maretem Nato blong Tautu mo tufala i bonem kleimen mo ol brata mo sista blong em olsem we i stap long family tri blong em. Em i talem tu se family tri we em i putum i kam long kot, em i family tri we generation blong em i stap long em follem mama blong em Mathlen, family tri ia nao em mo defendan i bin usem long aelan kot blong winim kes blong graon ia Tervaut.

TOKTOK BLONG KLEIMEN LONG TAEM BLONG CROSS EXAMINATION MO RI EXAMINESEN

Taem we spokesman blong defendan i questionem em, em i ansa mo talem se Family tri we em i putum i kam long kot em i family tri we em (kleima) mo defendan oli bin sit daon tugeta mo agri blong usem we i consist long generation blong kleima. Em i talem tu se sapos we defendan em i stap kleim se em i bladlaen blong Tamat why nao em i no save putum em wetem papa blong em mo generation blong em mo linkem wetem Tamat long wan famil tri, instead oli usem generation blong em (kleima) nao long lan kes Tervaut we i mekem oli winnim kes be i no long family tri blong defendan.

Kleimen em i further ansarem se em i bin wan witness blong sapotem kleim blong Tamat long lan kes long aelan kot mo em i stanap long taem ia from we oli usem family tri blong mama blong em mo ol generation blong em we I mekem oli winim kes.

Kleimen em i no save talem se Tabe em i wan ples or wan man, em i further talem tu se long Kastom blong kleim from graon em i tru long man, be sapos em i ded mo nomo gat laef blad blong em then bladlaen blong woman i save kleim we i mekem em (kleima) i kleim from we mama blong em nao em i gel blong Tamat.

Em i talem tu se risen why nem blong em i no stap long jajmen from we em i no spokesman be defendan nao em i spokesman on behalf blong em nomo mo jajmen i stap long pupu blong em Tamat we jajmen blong lan kes ia em i talem gud se Kemuel Harry em i represntativ nomo. Em i talem tu se ol brata blong Tamat Jeala mo Milen oli ded mo sista blong em Leitasi em i bonem Olit mo Dorin be tufala tu I ded.

Taem kot I questionem em em i ansa mo talem se long fes generations we i gat Natong mo woman blong em we tufala i bonem Henie, Lembel mo Sacknapat oli ded evriwan. Em i talem tu se em i no save nem blong papa mo mama blong Tamat mo ol nem long fes generation ia kasem Tamat em i tekem long olgeta long Tabe. Em i confemem tu se Jeala mo Milen tufala ded mo no gat generation. Em i talem tu se em mo mama blong em mo ol family nao oli mekem family tri we oli bin usem mo winim kes blong graon long Tervaut.



WITNESS BLONG KLEIMEN

Kleimen em i gat wan witness nomo we em i Mr Jeffrey William we em i gat 84 yia mo em i blong Tautu vilij Central Malekula. Em i mekem wan statmen mo putum kam long kot se kleimen em i stret blad laen blong Tamat we Tamat ia nao graon blong em em i Tervaut. Em i further statem se Kemuel Harry em i wan difren man we em i no blad laen wetem kleimen follem blad blong Tamat. Emi putum tu i kam long kot 2 family tri we wan em i blong kleimen mo nara wan em i blong defendan.

TOKTOK BLONG WITNESS BLONG SAPOTEM KLEIM BLONG EM

Witness i talem long kot se Tamat em i wan difren man mo Harry em i wan different man. Em i talem tu se em i fes man we em i risivim Tamat we i kam long Tautu. Em i tokbaot tu travelling blong Tamat we i stat long bushman bay kasem taem we em i kam long Tautu em i kam em wan mo woman blong em wetem tufala pikinnini blong em Mathlen mo Daniel, we tufala stap wetem mama blong tufala Kethy long Ambae. Em i continu talem se taem we Tamat i kasem em long Tautu em i askem wan smol ples long papa blong em and papa blong em i gem wan ples mo describem olsem we emi nara saed long yard blong Anata long em blong em i wok long em we oli kollem Jiweg.

Em i futher talem se Tamat i wok long eria ia mo plannem ol kaikai long em afta em i muv i ko long Ambae blong tekem woman blong em mo tufala pikinnini i kam bak long Tautu. Taem we Tamat i kam bak wetem woman blong em mo tufala pikinnini, papa blong Witness i bin ko continue wok long ples we em i bin gem long Tamat fes wan mekem papa blong witness em i gem wan mo ples long em we emi Lewu blong emi continue wok long em. Em i talem tu se defendan em i kam maot long family tri blong Rambe we i bonem Harry mo Harry i bonem Kemuel we em i defendan. Em i talem tu se defendan emi blong wan difren nasara mo statem se Delvet em i nasara blong Micheal, Milep emi nasara blong Ephraim mo Boukot em i nasara blong Robea, we olgeta evriwan oli ol difren man we oli kam maot long ol difren nasara.

TOKTOK BLONG WITNESS BLONG KLEIMEN LONG TAEM BLONG CROSS EXAMINASEN, RI EXAMINESEN

Taem kleimen i questionem em em i ansa mo confemem blong talem se em i gat 84 yia mo bin save long Tamat from we em i kam liv wetem olgeta. Em i talem tu se Tamat em i kam wetem tu (2) pikinnini blong em Mathlen mo Daniel. Em i further talem se Moltemes emi gat 3 sista, wan oli berem long black gate, narawan i bonnem Harry Rambe mo wan mo i bonnem mama blong em. Mama blong Harry mo mama blong em tufala i wan bladlaen nomo.

Taem defendan i questionem em em i ansa mo confemem blong talem se em i no harem mama blong em i talem long em se Harry em i family wetem Tamat. Em i confemem tu se em i save se Tamat em i blong Tervaut mo em i no bladlaen blong Nato be blong Mathlen. Em i talem tu se em i blong Tautu vilij be em i save gud Tamat tru long mama blong em we em i sista blong mama blong Harry.

Taem kot i questionem em em i ansa mo confemem se em i fes man we em i risivim Tamat long Tautu mo wan mo man Leng. Tamat i bin kam mo stap long Tautu from tribal war. Em i se risen why em i ko stap long Ambae from we woman blong em Kethy em i blong Ambae mekem oli ko stap long Ambae. Em i talem tu se Mathlen mo Daniel tufala i bon long Ambae



mo Mathlen em i stret blad blong Tamat. Mo em i neva harem long mama blong em se Harry mo Rambe tufala I wan nomo wetem Tamat.

RESPONSE BLONG DEFENDAN

Defendan em i no bin filem wan response or putum wan statmen I kam long kot be em i bin toktok long kot blong talem response blong em follem ol kleim blong kleimen. Em i talem se kleimen em i no bladlaen blong Tamat em nao em i Tamat. Em i continue blong talem se long lan kes blong Tervaut kleimen em i no wan kleima long lan kes ia em i wan witness nomo. Em i talem se family tri we kleima em i putum i kam long kot we em i annexem "A" em i family tri blong em. Em i further talem se CLMO ofis long Malampa provins emi no cancellem green certificate em i readim jajmen blong Tervaut lan kes nomo afta cancellem green certificate.

Em i further talem se histri we oli bin usem long lan kes em i blong laef blad blong Tabe mo Tabe emi wan man nomo wetem Tamat. Em i talem tu se Daniel son blong Tamat em i bon long Malekula mo I no long Ambae. Em i talem se Tamat em i travel i kam kasem Tautu afta we em i stap wok long wan sip mo sip i rek long Metavun long bushman bay. Taem we em i kam stap long Tautu em i no gat woman mo em i stap wetem ol pupu blong em Harry, Stephen, Bill mo Impon olgeta i wan traeb nomo wetem Tabe. Em i confeme tu se Tamat I kam mo wok narasaed long Anata long Jiweg.

Em i further talem se Tamat I faenem wan woman Aoba (Ambae) mo blong ko from woman ia em i no gat mani be Stephen boe blong em stap mekem bread mo em i givim mani long Tamat blong ko from woman blong em. Em i tokbaot se Tamat I travel ko long Santo afta ko long Ambae blong tekem woman blong em taem we oli kam bak em i kam wetem wan bebe we emi Mathlen. Em i se ol ofala oli bin hidem mo no talem olbaot se Mathlen emi no pikinnini blong Tamat and em i bin describem olsem logn lanwis se "Nambichbich" (we I minim coveremap). Em i talem se I no possible blong Tamat I kasem Ambae afta Mathlen I bon. Em i further talem se oli stap hidem se Mathlen e I no pikinnini blong Tamat be tedei nao em i jes talem maot se "Mathlen em i no pikinnini blong Tamat." Em i talem se Daniel em i only pikinnini blong Tamat mo em i bon long Malekula. Em i talem se Tamat long taem we bae em i ded i fulumap laplap long maot blong em mo em i talem long Harry se bae em i lukaotem gud Mathlen olsem sista blong em.

Em i refer I ko long family tri mo talem se risen why oli no putum nem blong papa mo mama blong Tamat from we em i blong olgeta. Em i putum tu I kam long kot wan family tri we em i decribem olsem wan traeb mo ol jif blong traeb ia we Tamat i stap insaed.

Emi putum tu I kam long kot Malekula aelan Land case 10 of 1993, land appeal case 3 of 2009.

TOKTOK BLONG DEFENDAN LONG TAEM BLONG CROSS EXAMINESEN MO RI EXAMINESEN

Kleimen i questionem em em i ansa mo talem se Magistrate court decision long civil kes 18 blong 2015 em i no wan kes blong blad laen. Em i talem tu se Harry lukaot gud Mathlen mekem Tamat i talem long em blong lukaotem gud Mathlen bifo em i ded. Em i further talem se Stephen mo Harry singaot papa long Tamat. Em i confemem tu se Tamat I plannem coconas I stap gro 3 to 4 manis afta em i aot ko long Ambae blong tekem woman blong em I



kam bak long Malekula. Taem we em (Tamat) I ko long Ambae Mathlen emi bon finis be em i no save confemem se whu em i papa blong Mathlen.

Taem kot I questionem em em i ansa mo em i talem se Tamat em i kam maot long Tabe we em i wan traeb. Em i talem tu se pupu blong em i witnessem we Tamat em i kam wetem Mathlen we em i 3 to 4 manis long Malekula mo Daniel I jes kam bon long Malekula. Em i no save talem mining blong Tamat em i se pupu blong em nomo I save. Em i talem se Tabe em i olsem wan wud we i stanap mo ol nara wud or branches I lei or kale long em.

Em i further talem se nem blong papa blong Tamat em i Drek mo mama blong em em i Viel. Em i no save confemem mo talem maot long kot Harry Kemuel em i connect wetem Tamat olsem wanem. Em i talem tu se Mathlen oli usem em long famil tri long aelan kot long kes blong graon from we ol pupu oli wandem hidem em. Kot I askem se em i connect wetem Tamat olsem wanem em i se Harry papa blong em Tamat, Tamat brata blong em Rambe, Otak wetem Rambe brata blong tufala Viel, mo Viel I bonem Tamat, emi no save putum I clear se hao nao Tamat em i tekem Harry olsem pikinnini blong em.

WITNESS BLONG DEFENDAN

Fes witness blong defendan em i Mr Micheal blong Tautu vilij central Malekula em i no putum any statmen I kam long kot be em i witness blong talem se em i laef blad blong Tamat, em nao em i pem lan kes kot fee blong Tervaut, mo em i wan Tabe traeb we oli winim lan kes ia.

TOKTOK BLONG WITNESS BLONG DEFENDAN LONG TAEM BLONG CROSS EXAMINATION

Taem defendan I questionem em em i ansa mo confemem blong talem se em i bladlaen blong Tabe and Mathlen em i no blad laen blong Tabe be em blong Ambae. Em i confeme tu se papa blong em nao gem 30 paon long Tamat blong ko from woman blong long Ambae. Taem Tamat ko from woman Ambae blong em be Mathlen i bon finis afta i tekem tufala i kam mo Daniel i jes bon long Tautu. Em i futher talem tu se Family tri we oli usem long kot blong graon blong Tervaut ol traeb blong Tabe oli mekem family tri ia.

Taem kleimen I questionem em em i ansa mo talem em se family tri we kleimen em i submittem I kam long kot em i no stret family tri. Em i talem tu long wan vilij kot decision we em i kleim adoption se Tamat i adoptem em decision blong vilij i bin stoppem em blong nomo usem nem ia Tamat we em i no usem kasem tedei.

Taem kot I questionem em em i ansa mo talem se spos em i blad laen Tamat olsem we I talem then why em i no usem nem ia Tamat em i reponse mo talem se defendan we em i brata blong em nomo nao I stap kleim on behalf blong olgeta family Tamat.

Secon witness blong defendan em I Openi Harry blong Unmet vilij Northwest Malekula em i witness mo talem se defendan Kemuel Harry em i laef blad blong Tamat we em i kam maot long Tabe. Em i talem tu se Mathlen we em i mama blong Josiah em i no blad blong Tamat mo lastly em I talem se papa blong Josiah em I blong Tautu vilij.

TOKTOK BLONG WITNESS BLONG DEFENDAN LONG TAEM BLONG CROSS EXAMINESEN MO RI EXAMINESEN



Taem defendan i questionem em i confemem nomo bakgen se Mathlen em i no blad laen blong Tamat, mo Tamat em i bladlaen we I kam maot long Tabe. Em i talem se kleimen em i wan witness nomo blong witnessem family tri blong defendan long Tervaut lan kes.

Taem kleimen i questionem em blong talem se why family tri we oli putum i kam long kot I no gat Kemuel Harry long em em i no save ansarem question ia.

Taem kot i questionem em em i talem se em i no agri long family tri we kleimen i putum I kam long kot from we defendan em i i no stap insaed long family tri ia. Em i talem long family tri blong Tamat i gat Mathlen, Daniel mo Kemuel Harry be em i no confemem se Kemuel Harry i connect wetem Tamat olsem wanem. Em i talem se em i save Tamat from we emi jif blong Tervaut mo em (Openi Harry) i jif blong Tribun. Graon blong em mo Tamat i vas tugeta. Em i talem tu se taem em I stap pefomem namangy Tamat stap ko witnessem. Em i further talem tu se Tamat em i nem blong wan traeb. Mo lastly em i talem se family tri blong defendan em i bin bon taem we haus blong defendan i bon we defendan mo fes witness blong em i no even talem toktok ia long kot.

KOT I MEKEM OL FINDINGS MO KOT ODA IA FOLLEM OL TOKTOK BLONG OL PARTIES MO OL WITNESS BLONG OLGETA

Afta we kot I harem toktok blong ol parties kot I mekem ol findings ia:

1. Kleimen em i talem long kot se Family tri we em i putum i kam long kot we em i Annexem em i "A" em i only family tri we em i usem long Island kot lan kes tedei em i usem bakgen
2. Witness blong kleimen we em i Jeffrey William emi confemem tu long kot se family tri we kleimen em i submittem I kam long kot em i usem long lan kes blong Tervaut blong sapotem toktok blong kleimen
3. Kot i faenem maot tu se Josiah Nato em i blong Tautu olsem we spokesman blong defendan I agri long em
4. Kot I faenem maot tu se kleimen em i kleim Tamat tru long mama blong em Mathlen we em i pikinnini blong Tamat we spokesman blong defendan em i no save pruvum se Mathlen em i no pikinnini Tamat
5. Kot i faenem maot se tugeta saed partie defendan mo kleimen tufala i bin sit daon mo agri tugeta blong draftem family tri we i kam bifo long kot mo family tri ia nao kot i bin mekem ruling long em long Lan kes blong Tervaut we i ko kasem Supreme kot,
6. Kot i faenem tu se spokesman blong defendan em i no providem enough evidence blong pruvum long kot se Kemuel Harry em i blad laen blong Tamat wetem generation blong em long wan family tri blong providem i'' kam long kot
7. Kot i faenem tu se taem we kot I stap questionem spokesman blong defendan em i no save confemem se Harry Kemuel em i blad laen wetem Tamat
8. Kot i faenem maot se witness blong defendan Openi Harry em i talem long kot se copy blong Family tri we nem blong Kemuel Harry I stap long em I bon long fire taem we haus blong Kemuel Harry I bon



9. Kot I faenem maot tu se spokesman wetem nara witness blong em Micheal Stephen tufala i no bin talem long kot se Family tri we nem blong Kemuel Harry I stap long em i bin bon olsem we Openi Harry em i talem
10. Kot i faenem maot se defendan em i neva challengem mo changem Family tri ia we kleimen i putum i kam long kot long lan kes we I ko kasem Supreme kot
11. Kot i faenem maot tu se spokesman em i talem long kot se Tabe mo Tamat em i wan man nomo
12. Kot i faenem maot tu se sapos Tabe mo Tamat em i wan man nomo be Island kot i bin declarem Tamat long Lan kes mo I no Tabe
13. Kot i faenem maot se i no gat any proof se pikinnini ia Mathlen em i blong man Ambae mo I no blong Tamat

WETEM OL FINDINGS WE KOT I MEKEM KOT I MEKEM ODA SE:


1. Josiah Nato emi blad laen blong TAMAT
2. Stat tedei I ko defendan emi mas stop blong usem nem ia TAMAT
3. Sapos wan long tufala parties I no glad long decision ia emi gat 30 dei blong emi apil I ko long Magistrate kot

ODA I KOT I MEKEM LONG 26 BLONG MANIS MARCH 2021

BY THE COURT



Justice Alina Malapa



Justice Edwin Edwin



Justice Kalangis Mele

Chairperson

